



Core Group Transparency-Timor-Leste (CGT-TL)

Rede Sociedade Cívil ba Transparénsia Timor-Leste

Rua Fatumeta, Manleuana (Seminari Maiór nia oin), Dili, Timor-Leste

Tel : +670 7700 8882 - 7734 8703

Email : cgttimorleste@gmail.com

Website : www.cgt-pwyp-tl.org


BlogSpot : <http://transparansia.blogspot.com>

Sub-Misaun ba Komisaun C Parlamentu Nasionál Proposta Orsamentu Jerál Estado 2021 Hosi Core Group Transparency (CGT)

APRESIASAUN JERAL

Emprinsipiu Core Group Transparency apresia tebes ba VIII Governu Konstitusional, ba planu no programa anno fiscal 2021, maibé ami mós haree katak, programa sira ba anno fiscal 2021 prezisa iha klarifikasaun, hadi'a no investe ba setór sira ne'ebé importante.

Proposta Orsamentu Jerál Estadu 2021 hamutuk biliaun US\$ 1,895, kuaze aumenta



21% (Tokon US\$ 398) hosi total OJE 2020. Grafiku iha leten hatudu katak, despeza

rekorenti nafatin hetan prevelezu kada tinan, ne'ebé maioria hodi fasilita orgaun esatadu sira. Nune'e bainhira haree fali ba proposta orsamentu tuir jornada orsamentál, governu kontinua sees dook hosi senáriu envelope fiscal 2021 ne'ebé iha, projesaun ba orsamentu anno fiscal hosi sustentável, moderadu ate kontinua hodi Fundu Minarai ba iha risku. Senáriu Orsamentu Estadu ba 2021 hanesan kalkulasaun no projesaun ba vida hosi Fundu Minarai (*sustentabilidade Fundu Minarai*), maibé infelizmente Fundu Minarai sei bele mohu hosi projesaun ne'ebé ita iha, tanba governu kontinua laiha konsistensia ba nia kometimentu liu hosi envelope fiscal liga ba programa ka planu sira ne'ebé bele kontribui ba hasa'e reseita doméstika.

Orsamentu Jerál Estadu iha tinan tolu ikus (2018 – 2020), no ba proposta tinan 2021, nia trend kuaze sa'e, maibé la konsege fó efektu hodi hasa'e reseita doméstika, ita nia reseita doméstika kontribui ba despeza Estadu entre 10% - 14%, ate seidak konsege hodi resolve órgaun soberanu sira nia vensimentu ba tinan ida nian.

Alende polítika governu hodi hadi'a kualidade moris povu nian, servisu todan ida ne'ebé labele haluha mak oinsá garantia sustentabilidade governu no nasaun, liu hosi garantia polítika fiscal, infelizmente investimentu Fundu Minarai liu hosi Orsamentu Jerál Estadu kada tinan, seidak bele garantia. VIII governu konstitusional iha tendénsia kontinua nafatin repete obra hosi governu anterior nian, falla hodi resolve devisa estadu kada tinan, ne'ebé kuaze 83% (*eskluí fundu hosi doadores*), iha tinan ne'e 2020, rekoilhamentu taxa ba atividade ekonomia rai laran atinje de'it 10%, ne'e mós tanba governu konsege selu dívida ba imprezariu sira, nune'e atu hasa'e reseita doméstika, depende fali ba despeza OJE, kuandu nia valor mantén, montante hosi reseitas doméstika mós mantén, ezemplu konkretu mak rekoilhamentu taxa iha tinan 2016, konsege atinje to'o tokon US\$195 (*real*) tanba Despeza annual iha tempu ne'ebá kuaze besik biliaun rua (US\$ 1,952), Polítika hodi hasa'e rendimentu doméstika seidak implementa ho másimu.

POLÍTICA FISCAL

Pilares hat hosi PED 2011 – 2030, Kapitál Sosiál, Dezenvolvimentu Infrastrutura, Dezenvolvimentu Ekonómiku no Enkuadramentu Institusional. Pilares hat ne'e hanesan pakote integradu hodi lori país atinje rendimentu médiu no altu. Hosi pakote integradu ida ne'e, governu apresenta proposta OJE kada tinan, inklui proposta OJE 2021 hodi justifika levantamentu Fundu Minarai excede 3% RSE hodi fó klareza ba membru Parlamentu Nasionál retornu hosi excede RSE Fundu Minarai. Hosi Core Group Transparency nia monitorizasaun hatudu durante tinan hitu (2013 – 2019), investimentu liu hosi orsamentu jerál estadu konsege hetan retornu finanseiru hamutuk provolta biliaun US\$ 1,212, liu hosi atividade ekonomia rai laran (*real*), no levantamentu Fundu Minarai provolta biliaun US\$6,360, kuaze fó efektu social barak liu kompara efektu ekonómiku no finanseiru. Efeito social importante maibé, importante liu mak fó efektu finanseiru hodi bele kria fali kondisaun ba efektu social.

Ami sempre apoia no konkorda ho política governu hodi hasa'e reseita doméstika, liu hosi implementasaun Reforma Fiscal no Jestaun Finansa Públiku, maibé bainhira haree nia trend hosi ezisténsia Komisaun Reforma Fiscal (KRF) ne'ebé estabese ona iha tinan 2015 hodi ajuda hadi'ak ka hasa'e reseita doméstika, infelizmente kontinua laiha serteza, ezisténsia KRF durante tinan lima (2015 – 2019) konsege kobra rendimentu liquidu tokon US\$24 de'it, no KRF nia despeza provolta tokon US\$16. No política sira ne'e la hetan apoiu másimu. Dokumentu balun ne'ebé ami asesu hatudu, rekoilhamentu taxa hodi hadi'ak trend liu hosi impostu ba atividade negósiu (impresariu), maibé tanba hetan prevelezu hosi autoridade trade invest, ho razaun hetan sertifikadu investimentu nune'e governu perda kuaze tokon US\$1,5 iha tinan 2019, seidauk inklui impresariu 185 ne'ebé la deklara sira nia impostu, se investidores sira apresenta sira nia impostu ho rutina, bele rekolla impostu provolta tokon US\$ 15 to'o US\$20 kada tinan.

Atividade komérsiu internasionál liu hosi importasaun iha tinan 2019 provolta tokon US\$ 596, maibé konsege kobra deit tokon US\$ 13, ate ita nia impostu indireita hosi konsumu uma kain boot liu provolta tokon US\$33. Signifika prevelezu hosi política balun ba impresariu labele ajuda hodi hasa'e reseita doméstika, ate fó perda fali ba governu.

Nune'e mós ami nia observaun ba política governu hodi fó oportunidade ba ajénsia autonomia sira ne'ebé kuaze sanulu resin hodi esforsu atu bele mós halo kolesaun ba reseitas hodi apoia hasa'e reseita doméstika maibé la akontese, despeza hamutuk tokon US\$60,616 konsege kontribui de'it 13% (Tokon \$8) ba reseita doméstika iha tinan 2020, hosi ami nia observaun iha tendénsia fó fali prevelezu liu hosi facilidade tanba kuaze 60% despeza liu hosi kategoria orsamentu bens no servisu.


Ami hanoïn katak, governu presiza ona halo ajustamentu tuir kontextu ba Lei ne'ebé Komisaun Reforma Fiskal propoin hanesan Lei Tributaria, Lei IVA no mós kodigu prosedimentu tributaria balun hodi bele iha serteza bainhira Fundu minarai mohu. Alen de ne'e mós ami husu atu kontinua halo liña koordensaun ne'ebé mutual atu labele fó perda ba estadu tanba ita nia trade balance boot maibé la konsege pusa ita nia reseitas doméstika, nune'e bele salva nasaun ne'e nia vida.

Ami mós sujere ba governu hodi reviu fila-fali, ezistensia ajensia autonomu sira ne'ebé kuaze gasta osan boot maibé la konsege fó efeito ba reseita estadu, ami nia haree iha tendensia halo fali perda ba estadu tanba kuaze hetan prevelezu.

Alende ne'e mós ami rekomenda ba Parlamentu Nasional hodi husu governu atu halo klarifikasaun ba kategoria Orsamentu Estadu liu hosi Bens no Servisu tanba iha kuaze orsamentu boot hodi fasilita atividade, maibé iha tempu hanesan, iha ona salariu no vensimentu (Ajensia autonomo Institute Jestaun Ekipamentu – IGE), no kuaze ajensia autonomu sira asesu oramentu liu hosi kategoria Transferensia públiku.

LEVANTAMENTU FUNDU MINARAI

Core Group Transparency mós rekoñese katak, laiha dalan seluk hodi hakonu devisa nasaun, so úniku Fundu Minarai mak bele taka devisa estadu kada tinan. Depois Ti



mor-Leste hetan reseita hosi atividade mina no gas, ita nia dependénsia provolta 75% to'o 90%, kazu konkretu iha tinan 2021, atinje to'o 83%, signifika investimentu Fundu Minarai liu hosi Orsamentu Jerál Estadu kada tinan, kontinua laiha serteza, ate investimentu boot sira hanesan Projeto Tasi Mane, ZEESM inklui mós empreza estatal TIMORGAP.EP, seidauk fó serteza hodi husik dependénsia ba Fundu Minarai. Levantamentu Fundu Minarai durante eziste gasta ona biliaun US\$12,004 (*Cash – Setembru 2020*). No investimentu ba projeto boot sira hanesan, ZEESM, Projeto Tasi Mane inklui TIMORGAP.EP (*Inklui sosa asoens Kampu GS*) ho despeza biliaun US\$1,674 hahu hosi tinan 2016 to'o 2020, no grafiku iha leten hatudu, despeza boot liu hosi investimentu projeto tasi mane, ZEESM no Empreza Públiku TIMORGAP.EP durante tinan lima nia laran konsege rekolla de'it reseita hamutuk token US\$28.


Ami hanoin katak, investimentu boot sira liu hosi infraestrutura importante, maibé presiza ona hodi prioritiza investimentu ba iha setór importante sira seluk, hanesan Agrikultura, Peska no setór turizmu, nune'e mós governu tenke maximiza ita nia nia trade balance hodi kria lei tributaria ne'ebé propoin ona no maximiza mós Empreza Públiku sira nune'e mós Ajénsia Autonomia sira ho kontrolu ida ne'ebé rigor atu bele kontribui másimu ba despeza estadu tanba investimentu ba tempu naruk liu hosi mega projeto sira laiha serteza, hanesan Projeto tasi mane, kondisaun sira ne'ebé kria hodi bele atende projeto ne'e iha tempu naruk, labele garantia, auto estrada foin 30Km, maibé hahú namtate ho 155Km ne'ebé planea.

No ita nia rezerva minarai iha Bayu Undan, konsege konverte hotu ona ba osan ka iha forma ativos finanseiru hamutuk 98% (2019), no iha tempu hanesan

dezenvolvimentu iha kampu Greater Sunrise laiha serteza. Tanba ne'e ami hanoin katak governu tenki kuida iha implementasaun no prudente iha levantamentu.

DESPEZA VS KAPASIDADE EZEKUSAUN

Core Group Transparency iha Esperansa ba Sua Exelénsia Primeiru Ministru Taur



Matan Ruak hodi halo política poupança ba Orsamentu Estadu maibé hosi ami nia monitoramentu ba Orsamentu Estadu tinan tolu ba hat nia laran seidak iha pratika, grafiku iha leten hatudu, VIII Governu Konstitusional iha tendénsia orsamentu ne'ebé la nesesáriu kontinua fó prioridade, kuaze kustu servisu profesional/asesor sira nia vensimentu metade hosi kustu saláriu kada tinan (49% selu ba Asesor), ezemplu konkretu ida iha Diresaun Jerál de Jogo (MTCI) nia total despeza rihun \$775¹ no kustu ba asesor rihun \$652, 84% hosi despeza kuaze ba selu de'it asesor, iha Gab. Vice Min. Agrikultura no Peska, nia despeza rihun US\$502, kuaze 55% hodi selu asesor. Inklui rubrikas ka despeza seluk ne'ebé persiza iha kontrolu mak hanesan material fornimentu ba operasionál, despeza operasionál, despeza hodi fornese ai han ba membru governu (Catering services), material fornimentu ba eskritóriu (*hanesan grafiku leten hatudu*), mina ba jeradór, no iha ami nia akonpanhamentu ba portal transparency governu, dala balun foin to'ó fulan Abril, maibé ezekeusaun atinje ona tokon \$8 hosi despeza total tokon \$69 (OJE 2019). Despeza hirak ne'e seidak inklui kustu alojamentu ba membru governu sira ho tokon US\$1.2. Tanba ne'e, despeza OJE nia pezu kontinua todan tanba kustu la nesesáriu sira no regaliais sira kontinua hatodan despeza estadu.

Ami konsidera katak proposta Orsamentu Jerál Estadu 2021 ne'ebé kuaze biliaun rua, US\$ 1,895 (falta tokon US\$104), kategoria boot, no bazeia ba planu no programa sira ne'ebé proposta, programa sira balun ami sente katak persiza redús nia orsamentu no mós hasai. No bazeia ba relatóriu ezekeusaun OJE 2020, hatudu katak orsamentu anno fiscal 2020 foin atinji 35% iha fim de Setembru, no bazeia mós ba relatóriu trimestral Fundu Minarai (Fulan Setembru), Banco Central Timor-Leste foin halo transferénsia

¹ Livru No 4B Pro. OJE 2021. Paj. 482.


² Livru Proposta OJE 2021, Livru OJE No. 2, MSSI, Paj. 167.

tokon US\$419, hosi tokon US\$ 983 ne'ebé promulga atu foti. Signifika katak governu nia kapasidade hodi ezejuta orsamentu limitadu tebes, no bazeia ba esperiénsia tinan kotuk liu ba, ezejusaun másimu liu 90%.

Bazeia ba ami nia monitorizasaun ba despeza estadu kada tinan, ne'ebé kuaze orsamentu boot para atu fasilita no habokur de'it mákina estadu, liu-liu sub-programa sira ne'ebé la nesesáriu hodi aloka orsamentu ho valor boot hanesan gráfiku iha leten hatudu, tanba kuaze 53% hosi tokon US\$421 (Bens e Servisu), atu fasilita operasionál ba mákina estadu no professional servisu ka asesor sira. no bazeia mós ba relatóriu ezejusaun orsamentu trimestral foin atinje 35% ho nune'e ami husu ba governu atu bele redús no hasai kustu sira hanesan fasilita ai han ba governu (Catering Services) no redús mós montante orsamentu atu bele iha sustentabilidade ba Fundu Minarai

DEZENVOLVIMENTU SÉTOR PRODUTIVU

Setór produtivu hanesan Agrikultura no Peska, Edukasaun, Saúde no mós setór Turizmu, governu konsidera hanesan setór ne'ebé



importante, no

presiza dezenvolve tanba hosi setór sira ne'e, bele iha efeitu multiplikadora no bele iha sustentabiliade fiscal, no ami apresia ba proposta OJE 2021 hatudu nia gráfiku sa'e kompara ho orsamentu tinan kotuk 2020, maske nune'e ami haree mós katak alokasaun ba kategoria orsamentu sira balun la koloka tuir fatin, orsamenu tokon US\$23,188 hosi Ministeriu Edukasaun ne'ebé atu halo konstrusun no rehabilitasaun ne'ebé tuir lolos iha kategoria Kapital Dezenvolvimentu, koloka fali ba iha kategoria Transferensia públiku.

Sétor Agrikultura, iha durante tinan barak nia laran, ita kontinua halo importasaun ba foos, ne'ebé tuir loloos Ministériu Agrikultura bele maximiza ona natar potenciál sira (80,578 hektares) hodi halo produsaun no bele hapara ona importasaun, tanba hosi ami nia monitorizasaun iha suku balun (Suku Leolima, Zumalai) hatudu irrigasaun fasilita fali area natar ne'ebé nia area ki'ik liu kompara ho area balun (Bonuk). Nune'e kuaze tokon US\$ 29,343 durante tinan 4 liu hosi investimentu iha Fundu Infrastrutura seidauk hatudu rezultadu diak, no kontinua atu investe tan tokon US\$3,798 (FI – 2021), no iha tendénsia kustu balun ne'ebé la nesesáriu kontinua sa'e, ita bele hare'e iha kuaze tokon hitu (US\$ 6,925) hodi aloka ba programa boa

governasaun no jestaun institucional kompara ho tokon rua (US\$ 2,373) ba Kap. Dezenvolvimentu hodi halo konstrusaun no manutensaun ba irigasuan. Ate parseiru dezenvolvimentu nia komitimentu hodi apoia dezenvolvimentu agrikultura no hasa'e produsaun boot liu kuaze tokon US\$ 24 ka provolta 60% hosi despeza annual Ministeriu Agrikultura no Peskas.

Dezenvolvimentu iha setór Turizmu, ita tenke konseinte, seidauk hatudu nia performa katak setór turizmu sai hanesan *Destino Unico, Cultural, e Ecologico*. Programa setór turizmu iha proposta OJE 2021 laiha diferenza ho programa (IV Governu) sira ne'ebé liu ona, ezemplu konkretu Estudu dezeńu ba Lagoa Maubara dezde tinan 2014 to'o iha tinan 2018 no kontinua proposta OJE 2021 maibé seidauk iha serteza ruma (*Kuaze tinan hitu*), no programa Ministériu Turizmu hodi kontribui taxa 5% kada tinan ba reseita estadu infelizmentu seidauk hatudu nia performa. Iha tendénsia promove fatin turistiku iha mundial maibé la konsege kria kondisaun, bazeia ba Centro Nasionál Chega (CNC) nia peskiza hatudu fatin sítiu istóriu iha Dili laran de'it hamutuk 21, maibé Ró ahi (Kapal pesiar) ne'ebé kada tinan vizita Timor-Leste, fatin mak Kristu Rei, Museum Rezisténsia, no Estátua João Paul II.

Hosi membru CGT nia monitoramentu ba setór saúde no edukasaun hatudu katak, fasilidade saúde hahú hosi munisipiu to'o nivel suku sei iha problema, hahú hosi pesoál saúde ne'ebé sei menus to'o fasilidade hodi halo atendimentu ba pasiente, kazu konkretu, pasiente gravida utiliza mikrolet hosi Postu Quelikai hodi transfere ba Hospital Baucau, nune'e mós moras TBC kada tinan sa'e. Alen de Sétor saude, Sétor edukasaun mós sai kestaun. Despeza orsamentu ba Ministériu Edukasaun iha tinan ne'e konsege sa'e to'o 8% kompara ho despeza tinan 2020 ne'ebé hetan deit kuaze 6%. Apresia ba númeru ne'e tanba hatudu katak setór ne'e importante duni no presiza iha komitimentu hodi investe, tanba bele garantia rekursu umanu iha future. No bazeia mós ba membrus CGT nia peskiza no monitoramentu hatudu katak, fasilidade edukasaun, hahú hosi sala de aula to'o fasilidade hodi hanorin, sei kontinua sai kestaun tinan ba tinan, nune'e governu persiza no tenke iha ona komitimentu hodi investe másimu hodi bele garante duni rekursu umanu iha future.

Bazeia ba fenómeno sira ne'ebé akontese, ami hanoín katak Ministériu Agrikultura e Peska maximiza Diresaun Nasionál Peskiza no Estatistika hodi identifika kauza sira alen de balun ne'ebé ami temi ona, atu nune'e grafiku produsuan kontinua sa'e hodi bele redus ona inportasaun.

Setór Turizmu, ami hanoín katak presiza ona investimentu ida ke sériu hodi kria duni kondisaun, liu hosi prepara ka hadi'a fatin trustiku no sítiu istóriu sira atu bele atrai ema hodi vizita, nune'e mós persiza ona iha komitimentu hodi investe iha setór saúde no mós edukasaun, no ami husu ba Ministériu Edukasaun atu bele kria kondisaun liu hosi fasilita mestri/a sira ho saláriu ne'ebé dignu no kria mós kondisaun ba sira atu sira bele iha vontade hodi prepara rekursu umanu, hanesan kondisaun diak ne'ebé governu kria ba dosente sira iha UNTL ne'ebé kada tinan governu aloka provolta tokon sanulu resin ho saláriu ne'ebé di'ak. No ami rekomenda atu iha atensaun ba

mestri/a voluntáriu sira ne'ebé tinan ba tinan kontrata hela de'it maske kuaze tinan sanulu resin serve nudár edukador.

Ami husu ba Governu hodi tau ona inportansia ba sétor produtivu sira ne'e, no tenki iha ona komitmentu hodi aloka orsamentu provolta 25% - 30% ba sétor hat ne'e hodi bele garantia duni sustentabilidade intermu rekurusu umanu ne'ebé ho qualidade, no garantia duni ba soberania ai han.

TENKE IHA KOMITMENTU BA EMA HO DIFIENSIA

Apresia ba Programa VIII Governu konstitusional, ne'ebé iha ona programa spesifiku ba ema ho difisiensia², no ami iha esperansa, programa hirak ne'e implementa ho sériu atu bele atinji nia objetivu, tanba iha esperiensa balun hatudu ona, hanesan iha programa PNDS, ekipa konsultasaun sira dala balun involve ema ho difisiensia bainhira trasa planu konaba padraun no standar dezeńu ba ema ho difisiensia, no iha implementasaun iha duni dezeńu maibé la asesivel no la tuir padraun nune'e ema ho difisiensia dezaraska hodi utiliza.

Ba asuntu ema ho difisiensia, ami husu atu governu labele hanoin bele resolve deit ho osan, hanesan subsídiu *cash* ne'ebé governu kria ate ohin lora. Ami apresia programa ida ne'e maibé ami sente katak persija mós atu governu kria kondisaun ba ema ho difisiensia iha kualker fatin públiku tanba alende ba ema ho difisiensia permanente (*provolta ema 3.2% tuir sensu 2015*), kondisaun sira ne'e mós bele kria ba ema ho difisiensia nonpermanente.

Ami husu ba governu atu iha komitmentu nafatin ba programa ema difisiensia, no husu atu ministeriu sira hanesan Ministeriu Solidaridade Sosial no Inkluzaan, Edukasaun, Saude, Justisa, Ministeriu Obras Públiku, SEPFOPE, SEKOMS, SEII atu iha koordenaun bainhira hala'o programa ka kria kondisaun ba ema ho difisiensia atu kondisaun no programa ne'ebé kria la'os atu halo ka ezejuta deit maibé kria duni kondisaun no asesivel ba ema ho difisiensia.

PROSESU TRANSPARÉNSIA IHA RAEOA TENKI IHA KOMITMENTU NAFATIN

Haree ba livru OJE No. 3-C RAEOA-ZEESM, ami nota katak, prosesu transparénsia iha RAEOA intermu orsamentu reseita no despeza balun hatudu, tanba ita bele aksesu iha livru ne'e, maibé iha ami nia monitoramentu liga ba despeza estadu liu hosi infrastrutura, tantu grandes projetu no infrastrutura baziku sira, hosi autoridade RAEOA la nakloke ka hatudu progresu hosi implementasaun projetu, ate autoridade rejiaun sira lakoi hodi kolabora relasiona ho progresu konstrusaun intermus ezejusaun orsamentu, no progresu konstrusaun. Ezemplu konkretu mak konstrusaun Otel sinku estrela, hahu hosi tinan 2015 ate agora seidak remata. No laiha kolaborasaun hosi autoridade rejiaun, difikulta ami hanesan sosiadade sivil defisil

² Livru Proposta OJE 2021, Livru OJE No. 2, MSSI, Paj. 167.

hodi kontrola nia progresu. Hatudu katak prosesu transparasia iha nivel RAEOA la ho sériu.

Bazeia ba deskobrimentu ka progresu konstrusaun ne'ebé la hatudu ho totalmente nia transparasia, ami husu ba Parlamentu Nasional atu halo investigasaun ba grandes projetu sira no mós infrastrutura baziku sira tanba orsamentu RAEOA kada tinan sempre halo tranferensia direita ba konta RAEOA nian, nune'e defisil mós hodi hatene nia transparénsia.

Ami mós husu ba Parlamentu Nasional hodi husu ba Autoridade RAEOA hodi apresenta relatoriu hosi orsamentu RAEOA nia jurus durante ne'e, atu públiku bele akonpaña no hatene alende reseita ne'ebé RAEOA hetan, tanba iha livru Proposta OJE 2021 No. 3-C sobre kolesaun reseita, item ba jurus lahatudu.

Ami iha esperansa ba Membru Parlamentu Nasionál atu diskuti ho kle'an no ho ulun malirin atu lori povu no rai ida ba moris ida di'ak, dignu no sustentável.

Mak ne'e de'it ami paresér, espera bele ajuda uitoan ba Membru Deputadu/a sira hodi diskute ho Membrus Governu sira.

Ikus liu ami hato'o obrigado ua'in!

Dili, 19 Novembru 2020

Sabino Gusmão Fitun
Koordenadór Sek. Core Group Transparency
7700 8882